

摘藻堂四庫全書薈要

集部

欽定四庫全書叢要

集部

道園學古錄卷一

二



臣董誥詳校  
詳校官助教臣謝登雋

欽定四庫全書薈要

道園學古錄總目

在朝藁

二十卷

卷一至二十

應制錄

六卷

卷二十一至二十六

歸田藁

十八卷

卷二十七至四十四



方外藁

六卷

卷四十五至五十

臣

等謹按道園學古錄五十卷元虞集撰集

字伯生蜀之仁壽人宋丞相允文五世孫居  
江西之崇仁從臨川吳澄遊以薦授大都路  
儒學教授擢國子助教遷集賢修撰翰林待  
制兼國子監祭酒文宗天歷中拜奎章閣侍  
書學士進侍講學士順帝初謝病歸臨川卒

贈仁壽郡公謚文靖集著作為有元一代冠  
冕平生為文萬篇存者十之一二其在朝應  
制歸田方外諸藁總五十卷者曰道園學古

錄其中之詩稿亦曰芝亭永言又有別集曰  
翰林珠玉其從孫堪又訪得其詩七百四十  
餘篇曰道園遺稿今之行於世者又有道園  
類藁與學古錄互有出入金華黃潛以學古  
錄為集手自編定然其天藻詩序云友人臨

川李本伯宗輯舊詩謂之芝亭永言又賦謝  
李伯宗題云至元庚辰冬臨川李伯宗黃仲  
律來訪山中拾殘藁二百餘篇錄之而李序  
又云至正元年十有一月閩憲烏公徵先生  
文藁本與先生幼子翁歸及同門之友編輯  
之得在朝藁二十卷應制錄六卷歸田稿一  
十八卷方外藁六卷此與今本正相合即所  
謂烏克章建本者是也庚辰是至元六年其

明年辛巳改元至正是則李本黃鍾之錄文  
於山中與其刻於閩中相去僅一年耳是編  
為李本所定無疑也自元暨明屢經刊印然  
皆從建本翻刻亦間有參錯不合類多出後  
人所竄改今一以元本為正云乾隆四十三  
年四月恭校上

總纂官臣紀昀 臣陸錫熊 臣孫士毅

總校官 臣陸費墀

欽定四庫全書



目錄



欽定四庫全書薈要卷一萬六千三百二十八

集部

道園學古錄卷一

在朝藁一

元 虞集 撰

賦

別知賦送袁伯長

余忽忽處此之無故兮幾偃蹇以自窮  
逝斂裳以遐征兮抗九霄之雲風  
頽三辰之徘徊兮遲後古以爲期  
何夫子之俚俚兮亦踉蹌而在茲  
于嗟乎世德之浩浩兮

恥謂人以不賢陳珮玉於交遠兮被徒輿以瑤環設厚

顏之鬱沈兮孰敢即問乎津涯發疾呌于咽嗑兮衆披

靡而莫支夫治倡之狐惑兮豈不足於內揆顧西子之

蓬垢兮益返忌兮故意惟前聖之無悶兮老氏亦貴夫

知希顧涼薄之多懲兮猶慷慨而尚辭余固將去此而

無悔兮念夫子之與我日進余以不及兮又證余以其

可余嘗究往來之為道兮論因革之為權莫或知其護

落兮子獨謂其固然庶久子以自輔兮克有聞以時行

忽先我而南騫兮殆若為乎余情迺歌以送之曰長江  
渾渾兮春多浪波白日耿耿兮擊楫為歌天薄我賦兮  
非以病我于嗟兮昔之盛者何其多

### 古劍賦

吳季有劍古所服兮先時利行後伏匿兮歷世十百神  
物來兮精英上浮久乃識兮截截庚庚玉理仄兮質化  
光泯黝正黑兮匡視白日澹斂色兮燧人司金石水泐  
兮終古不磨奇雄特兮勿褻勿試靈具戒兮鬼目睒睒

頭鬢鬢兮竊擬窺之自造慝兮靈怒殛女不女貸兮神  
宮無人帝湛默兮季冠如山采衣翼兮長身好修又正  
直兮稱是容佩有加飾兮魚室珠璣雜文織兮虞于帝  
傍順降陟兮握竒中運授神職兮旋陽制陰物不忒兮  
辟却百非五兵息兮大宰不劓完以為德兮變窮于傳  
填無極兮

畫枯木賦

夫誰畫此枯樹兮臨不食之散泉既偃蹇又嚙食兮骨

岸岸以弗妍想執筆以極思忽機釋而神旋遺衆壞於  
斲有勒不毀之所全或堊去於斤運或石泐於溜穿滄  
無雨以如晦悅非規而能圓澹黜乎其既失旋蒼然而  
在前命以物而不可孰春秋而論年噫吁嘻被草以毛  
膏膚用丹皆為流眩顧常注次獨何為托寂寞於無意  
而刻畫其不傳者邪

木齋賦

奎章閣藝文監秀才方積昔在匡廬讀書羣木之間謂

之木齋余愛其高秀而賦之其辭曰

夫何碑砢以差戕兮據積水而鬱盤有梗楠與豫章兮  
翳松柏之凡凡攬芳草之盈庭兮聽呦呦之鳴鹿濯余  
纓於滄浪兮沐余髮乎飛瀑余潔清以有待兮歎望之  
而彌高絳余驂以弗馳兮氣緜薄而心勞感春物之芳  
葩兮又晚實之不食更千歲其未已兮退自脩乎茲室

操

思魯琴操

龜山之陰陰兮有雲垂天河目而海口兮將見其人望  
之彌尊兮即之彌親大音寥寥兮中信而真

芝亭永言

古詩四言

味經堂詩

國子祭酒魯公伯子翬父作味經堂自為記以勗其  
子遠公嘗命遠從予遊故賦此詩

維昔立聖有子過庭學禮學詩詔之丁寧面牆之室繇

不知味親能使學不能使嗜觀於德容聽於德音詠歌

周旋實悅我心邈乎千載聖往言在舍而不求匪罔斯  
殆畏友輩父窮經篤行既有諸躬思貽厥成既蓄既畚  
俾稼之食既畋既漁俾鼎之實作堂高明曰子遠來吾  
經在茲遠其味之始予虛羸匍匐來食茹草飲水以禦  
朝夕窮人得歸自我父師俛焉斯文老至不知煌煌靈  
芝如彼嘉玉薄言采之在彼中谷南陽之人來詹來言  
君子豈弟宜其後昆



題宋誠甫侍郎垂綸亭

岷源建高駛無游船漢會其委安流滔滔爰有君子垂  
綸其下雖不得魚意甚閒暇援藟引楫至於中沱蔭樹  
以休悠悠永歌逝波汙汙不轉維石樂茲忘憂矢言不  
食烝然雲興風舉以高馳翔中天遺景九臯木其落矣  
魚亦潛渚睠言夙好除於風雨風吹衣裳彼為栖栖行  
吟望予實勞我思山有榛棘河有鯉鯉豈其飲泉必泠  
之美君子冠純秩秩大經洞有清酌可以濯纓

高彥敬青山白雲圖

兩崖之間曾不容舳白雲悠悠與山俱高

趙忠簡公祠堂詩

皇元至順三年春解州聞喜縣學用禮部符祠其鄉  
先生故宋丞相趙忠簡公公六世孫國子博士貧翁  
求虞集作迎送神詩

山河邈悠宗國為虛騎箕來歸懷此故都鳴梟在樹飢  
鱸在渚閤宮不存公食無所董澤之陂有蒲與荷子孫

具來式燕以歌瞻彼洛矣其水泱泱斯文在茲俾也可  
忘

秦檜既貶趙公於海南隨使人逼殺之公臨終從所  
寓寺僧索素帛一方書其上云身騎箕尾歸天上氣  
作山河壯本朝以付寺僧而絕聞喜之董澤公鄉也  
賦衛節婦王夫人

汎汎淇水岸有佳竹閨門嚴嚴樂爾貞獨泛泛淇流岸  
有松舟閨門間間樂爾貞幽汎汎淇右有堂孔阜娟娟

貞幽肅肅眉壽淇原有泉可濯可沿亨醞勺尊樂爾高  
年高年樂止亦有孫子式歌衛風以告國史

題學易齋

其人將  
詣孔林

惟學易君子慎其齋居動息有存起處是於奇耦玩畫  
方員視圖畫循靜始夜根動初罔不在中日居月諸乃  
東元化以時盈虛共惟玄聖啓我後愚載瞻巍巍魯林  
鬱如

古詩五言

諼草生竹間

諼草生竹間翠色相綢繆美人欣有託君子故忘憂昔  
聞有鳴鳳飲水來丹丘不食衆木實樂只淇園秋

高竹臨水上

高竹臨水上幽花在崖陰以彼貞女姿當此君子心春  
陽不自媚夕露忽已深湘妃昔鼓瑟悵望蒼梧岑

月出古城東

月出古城東海氣浮空濛車騎各已息宮闕何穹窿牧

馬草上露吹茄沙際風帳中忽聞鴈傳令穀雕弓

書上京國子監壁

神京極高寒幽居了晨夜雷風無時發零雨每飄灑炎  
光不到地蕭爽度長夏大化漠無宰豈必事陶冶揚雄  
不曉事守道栖栖者玄經百無徵白髮謾盈把

至治壬戌八月十五日榆林對月

日落次榆林東望待月出大星何煜煜芒角在昴畢草  
樹風不起蛩蛸絕啁唧天高露如霜客子衣盡白羸驂

斲餘棧嫠婦泣幽室行吟毛骨寒坐見河漢沒驛人告  
晨征瞳瞳曉光發

憶三十年前與元復初叅政同賦秋日梨花元有  
句云朝食葉底梨莫看枝上花而忘其後句因續  
之云

朝食葉底梨莫看枝上花花開食實後霜風振長柯遠  
水良可鑒彩雲亦易過念爾白於雪日莫當如何

李老谷

十轉山嶮交九度沙磧溜始辭平漠曠稍接山木秀老  
病畏行役慰藉得良覲秋嶺晚更妍寒花晝如繡故園  
夫如何朝陽眩霜袖

泰定甲子上京有感次韻馬伯庸待制

翰音迎日轂儀羽集雲路寂寞就書閣老大長郎署為  
山望成岑織錦待盈度我行起視夜星漢非故處

賦水木清華亭

中流泛蘭枻望彼嘉樹林落日蕩野水浮雲生夕陰游



魚戀芳藻好鳥鳴幽岑為樂恐易老吾將脫朝簪

天歷戊辰前續詠貧士一首

目昏畏附火枯坐寒窓中破褐著絮重虛豆兼冰崇病  
骨於此時浮屠屹撐空呼兒檢餘歷記日待春風雖欣  
解凍近翻驚紀年窮賞酒欲自廣無錢似陶翁

又一首答舍弟見和

蜀侯昔罹憂嶺海萬死中詩書庶不泯焉思祿位崇爾  
來五十年所以恒屢空涉世惟信道卓然立顏風漫仕

非我能偶貧豈人窮深耕定有獲歸嘆兩衰翁

後續詠貧士四首

老骨寒不寐夜長况聞風心悸危欲折跼蹐敗絮中鷄  
鳴當晨叅馬疥芻不充山童衣百鶻喚之愧匆匆求火  
掃木葉庭樹亦已空決起不敢怠曙光屋南東苟遂牛  
馬性歸放春草豐

歸蜀越關隴棧閣危登天適越河濟隔堰水丈尺間飢  
寒迫旦暮舟車計茫然東家有一叟欲去初不言早朝

聽詔畢喚馬閭闔前童奴受宿戒向暖爭相先聞之嗔  
兒子我何為汝牽屨無千金賈吾足安暇憐

為政貴察色讀書在研覃司視既不明兩者無一堪尚  
不遑吏責為師固宜慚聖世無棄物況茲久朝簪決去  
豈我志知止亦所諳頗聞南山下菊根浸寒潭濯餌千  
日期冰臚復清涵老馬果識道更服鹽車駝

天風夕號怒霜日殊清妍探架得古書前日手所編奈  
何視茫茫字若萬蟻緣精意成寂寞惆悵還棄捐於惟

仲尼衰清夢不復然小子未聞道何以卒歲年

觀花有感

掛巾花樹枝酌酒花樹下風吹巾上塵花落手中筭清  
唱起相壽母遽且聊暇流光急去人莫怪行樂者

赤城館

雷起龍門山雨灑赤城觀蕭騷山木高浩蕩塵路斷魚  
龍喜新波燕雀集虛幔開戶微風興倚杖衆雲散

同閣學士賦金鴨燒香

黃金鑄為鴨焚蘭夕殿中窈窕轉斜月逶迤動微風綺  
席列珠樹華鐙連玉虹無眠待顧問不知清夜終

退直同柯敬仲博士賦

月下白玉階露生黃金井踈條栖鵲寒衰蕙流螢冷戀  
闕感時康懷歸覺宵永晨鐘禁中來白髮聊自整

送良上人賦得井上桐

桐陰秋轉薄井氣曉為霜交柯舞幽鏡墮葉響鳴璫高  
巢翠羽下澄水玉蚪藏上人從定出行吟繞石床

送吳子高

懷寶獻京國悼亡還獨歸  
日落雲中樹風吹江上衣  
湘靈瑟在席織女石支機  
遠道多寂寞強飯勿相違

于仲元舍賦紅梅

白雪不成夜丹霞遂崇朝  
妙質承日映飛英向風飄  
醉來紅袖近歌罷彩雲消  
揚州問何遜何似董嬌嬈

寄題新冶亭

窈窕冶亭莫蕭條江南秋  
泛覽山河外張樂鳳皇丘  
公

子飛翠蓋美人回綵舟從茲至黃髮樂哉以忘憂

題儋耳東坡載酒堂

翳翳儋耳城歷歷枕榔樹百年遺故丘新堂設賓昨清  
風海上至朝陽在庭戶丹山五色鳳覽德屢來下甘辛  
熟桂酒羅列雜諸贍符黎多孫子食飲祭先具蛟龍波  
浪深歸來風雨除

鑿井得甘泉渴者恒自私流潤不擇地委順復何疑海  
南絕風雨水木沉華滋隣舍解讀書諸生還誦詩何必

懷故都聊樂宜在茲星河度白鶴山月懸蛾眉來晚去  
何速勞人千載思

盜發亞父塚

彭城有盜識寶氣於亞父塚上發之得一劍云

盜發亞父塚寶劍實累之塚開寶氣盡獄吏書盜辭盜  
言惟見寶寧知亞父誰項王不相信弟子遂與尸黃腸  
下深錮千歲復何為大河繞城東落日在城西過客立  
城下踟躕望安期

應制題王拙畫吳王納涼圖



雨過太湖上風生響屨廊紅綃拂几席白紵製衣裳朱  
光淪厚地明月在高堂何以保玉體長年樂未央

步虛詞四首

步虛長松下流響白雲間華星列燿火明月懸珮環肅  
然降靈氣穆若愉妙顏竹宮憺清夜望拜久乃還

稽首望太霞離羅間層霄綢緼結冲氣要眇出空謠前  
參千景精後引務猷收攝衣上白鶴招搖事晨朝

朱光出東海高臺迎赫曦六龍獻陽燧九鳳保金支鍊

丹軒轅鼎濯景崑崙池拜賜冰玉佩玄洲共遨嬉  
學仙淮南王問道劉更生三年鍊神丹九載凌上清日  
月作環珮雲霓為旆旌回首召司命靈雨灑蓬瀛

題商學士畫

方士好服食商山多紫芝采之長松下濯以清澗漪滄  
涼百里內秦皇都不知駕舟載男女築宮東海涯

贈藝監小吏

廣術何迢迢榆槐蔭蔽之鼓鐘晨莫起車馬中間馳此

有嫠居者閉戶教孤兒十歲學文史十五從吏師丹青  
出天性落筆有令姿藝監取材伎小大無一遺署兒莞  
庫下祿薄不足為手持一束書求以慰母思告兒勿薄  
吏公卿出自茲請看孟氏里軻母自有祠

記子昂畫

春風動蘭葉庭戶光陸離言收竹上露石角掛練衣車  
行不擇路莽以何楚楚遊子憺忘歸徘徊歲云莫

送西臺治書仇公哲

陝郊得時雨生意始來復存者事稼穡還者葺墻屋安  
知凋瘵餘政可致新福闢除正廣術區井表深瀆均齊  
定恒志忠厚保敦篤豈無憂世士受仕在芻牧為義苦  
多違好名常不足治書肅將指善類庶有勗

送張道士歸上清

白雲貯水上自古多仙人手携綠玉杖頭戴白綸巾袖  
中出風雨天上禮星辰歸來庭戶靜芳草自生春

日出行

日出上城府日莫當蚤歸城門已擊析出郭何焉依下  
馬投館人空垣月當扉涼風振庭樹巢鳥屢驚飛起坐  
搔白髮忽如霜草稀周公不復夢仲尼故沾衣老萊有  
孺色傳聞惟食薇求之事已晚徘徊行道微

贈治冠者

車馬入隘巷言尋治冠師反關不受客高坐哦書詩布  
衣不掩脛晝食甘藿藜冠成動經歲不售亦不辭我少  
好文章把筆無不為愧爾爰寂寞慎與當自茲

贈寫真佟士明

佟郎居上京閱人如風花拈筆寫其似千歲留英華邇  
來七十年將相紛在目來者有如此往者那可續昔我  
初北遊面白鬢如鴉點染煩粉墨華星暎丹霞今如雪  
中松苦硬雜蒼白却視當年容邈如不相識不識當如  
何臨風且長歌黃雲接河漢白雪漫坡陀乞身願歸老  
吳蜀山總好贈君千黛螺翠色秋可掃

寄陳衆仲助教上都作

學省足清晝詞垣驚蚤秋美人隔河漢落月在高樓持  
衣未成曲吹笛不勝愁還趨鳩鵲觀別製鷓鴣裘

贈鐵菴道者二首

昔遊雲臺觀山色上衣青松花春雨落栢葉秋露零飢  
來煮白石睡起看黃庭人間忽已老莫問少微星  
海上別妻子山中求伏苓白虎戲玄渚蒼龍護黃扁燒  
香招五老行厨庖六丁從子似非遠丹霞粲華星

題商德符華山圖

昔祠雲臺館行穿御階栢夕陰嵐氣深重碧照行客獨  
訪張超谷漸覺巖險迫冰生玉井頭日射仙掌側豈無  
鐵鎖懸翻身若飛鶻恐煩華陰令不奈昌黎伯王事況  
有程車馬何忽忽流觀終南山周覽天府國爾來十七  
年欲往不再得山河想邈悠傷殘轉蕭索摩挲商老圖  
彷彿希夷宅高哉蓮華峯白雲澹秋色

寄幻庵主者

朝遊武夷麓莫入匡廬岑放舟臨野水采藥過幽林清



泉磨寶劒磐石鼓瑤琴臘月歸溪上還作蚤春吟

賦茅山道士雲松巢

昔年李太白廬山思結巢褰雲自天上和鶴止松梢道  
士潘閒遠高居古大茅誦經門卧虎看劒石眠蛟飛步  
脫鳧舄長吟吹鳳匏九江攬秀色許爾作神交

酬上清道士鈔陰何詩

殘雪松上落輕冰硯裏生寫詩過夜半欹枕又天明少  
陵愛何遜太白似陰鏗不愁勞弱翰亦足助高情

題李溉之學士白雲半間

山中多白雲何由到城邑招之恐不來欲攬遽無迹  
栖檐候晨光納牖作秋色用冲不為盈常住寧若客分張  
任蒼松散落還白石日照香爐峯月射仙掌側有恩封  
一鄉與子當共食

題浴日觀

煌煌赤老烏三浴乃出海波濤始滉漾宇宙破冥昧西  
登泰華顛東望方丈外稽首希夷翁今晨良慶會

為范尊師賦雲林清遊

大茅千仞下結屋三四楹  
雲林戶牖潤鶴去海天平坐  
上發長嘯人間聞玉笙  
斲苓春霧重煮朮晚烟輕  
綠室噓丹氣蒼崖受日精  
樵遺伐木斧真降引霓旌  
九鼎金還就千齡樹不傾  
問誰解居此云是范長生

吹笛圖

白雲悠悠去長松披高丘  
匡坐吹笛人似是馬督郵  
飛鴻遺哀響幽泉發春流  
女樂亦何有逍遙以忘憂

送甘以禮調官歸鄉

甘君有良材於政無不宜白頭郡縣下尚覺非所施奈何筦庫冗而可絀吏師豈直名吏師積學本書詩高情抗浮雲廉節濯清漪君子安所遇固無喜愠辭嗟我忝從官簪筆恒殿帷竟無國士薦徒稱故舊知晚歲向田里藜杖相追隨尊酒以怡老未為負明時

送李彥方閩憲

文監李公彥方出貳閩憲同朝羣公皆賦詩以為贈

彥方屢擢臺職激揚之宜有不待予言者適有一事  
深有感於愚衷先正魯國許文正公實表章程朱之  
學以佐至元之治天下人心風俗之所係不可誣也  
近日晚學小子不肯細心讀書窮理妄引陸子靜之  
說以自欺自棄至欲移易論語章句直斥程朱之說  
為非此亦非有見於陸氏者也特以文其猖狂不學  
以欺人而已此在王制之必不容者也閩中自中立  
之歸已有道南之歎仲素愿中至于元晦端緒明白

皆在閩中不能不於彥方之行發之去一賊吏治一弊  
政不如此一事有以正人心儒者之能事也集卧病  
目青尤甚援筆書此云

七閩去天遠顛連苦無告牧人受深寄昧者覆為暴犀  
象雜金貝饑渴劇飮膏大言相鄙夷饕奪心自校豈無  
循廉吏實病黑白撓聰明屬旒黠聽瑩資所到李侯金  
閏彥圖史擅讎校晨聞大夫奏夕理武夷棹君子慎修  
職寧適豐廩稍蕉荔甘多毒薑桂老堪笔所懷延平翁

揚休似明道授受有源委精微足深討言立聖如在表  
正愚可造師匠久不興真妄如杓鑒云何誚支離肆誕  
長亮傲異言古所誅末學足深悼閩雖在海隅前聞此  
淵奧正誼從簡編良俗宜善導贈言不及它持此永為  
好

題鄭秀才隱居

陶翁昔好菊荒徑不暇鋤素琴初無絃名酒亦屢虛雖  
有二三子薪水不讀書淒涼千載下高名將焉如不如

鬼谷洞鄭子樂有餘種菊以為田田中更為廬善藥不  
二價詠觴送居諸有子揮五絃涼風在庭除時來青田  
鶴亦出濠梁魚昨者遊京師侯門曳華裾捧檄忽一喜  
翩然告歸與芳蒲采甘露玉漿釀清醕老父坐堂上稚  
子具籃輿晨遊南山陲暮濯清水渠席間撫猗蘭房中  
詠關雎以此得高壽何必南陽居

題朱邸竹木

猗猗淇園竹結根磐石安枝幹相扶持風雨不可干其



實鳳所食君子思保完恒恐聲影疏蕭條霜露寒金玉  
慎高節千載承清歡

詠史

軒后邈已遠漢武亦雄哉荒忽九州外百年過煙埃變  
化庶長久臨海築層臺黃金靡鏤飾喬林摧斷栽樂通  
竟先死孫卿殊未回不知作者意空令來者哀奉盤泣  
繁露馳道殷奔雷志氣昔所在風雲恒往來

畫古木

荒郊卧蒼苔蛟龍在其上不知風雨來垂影一千丈後  
主撥鐙法江南久寂寥空令沒骨畫容易媚中朝

賦蘇伯修滋溪書堂

滋源恒伏流春雨川乃盈林疇廣敷潤草木俱繁榮臨  
深見遊儵仰喬有鳴鶯君子樂在斯齋居托令名積學  
抱沉默時至有攸行抽簡魯史存采詩商頌并禹穴追  
馬公湘江歌屈生紉蘭不盈握伐木有餘情浩然欲浮  
海歸興還濯清方舟我為楫白髮愧垂纓

題薛外史瓊林臺

高臺積方石瓊林樹交柯  
晨光眩白雪夕景纏紫蘿  
每聞樵子唱恐是仙人過  
塵世在足下豈能聞笑歌  
過海祇騎鶴開池還養鵝  
外史政瀟灑太白焉足多

送張兵部孟功巡河分題得屋上烏

花發上陽春門開未央曙  
城柝起羣栖流光散朝羽  
息影須近檐結巢願當戶  
轆轤轉金井終日灌嘉樹

題彭澤陶氏家譜

百覽在戶外五柳當門前燕去王謝宅人依墟里煙述  
德尚千載人情猶昔年以安遺孫子高哉為世賢

道園學古錄卷一

欽定四庫全書薈要卷一萬六千三百二十九

集部

道園學古錄卷二

在朝藁二

元 虞集 撰

芝亭永言

古詩七言

賦洛川老人九十

洛川老人年九十須眉如畫身玉立錦袍金帶方烏巾  
手挽強弓無決拾八月平原秋氣高聞有狡獸依蓬蒿

清晨上馬薄暮返累騎毛血懸韃橐身是前朝將家子  
生逢太平百無事都將英氣化高年何物小兒堪指使  
太守上言朝有恩束帛養牛兼上尊洛川老人過百歲  
擊壤為歌傳子孫

張令鹿門圖

張侯襄陽人深知襄陽樂十年宦學懷襄陽故托豪縑  
寫山郭老我不樂思蜀都人言嵩陽好隱居三十六峯  
常對面水竹田廬還可圖欲往不能心惴惴忽見新圖

被山惱沙禽浦樹俱可人金澗石床為誰好向來耆舊  
皆英雄駕言從之道焉從弄珠月冷識遊女沉劒潭深  
知卧龍八月霜晴水清淺聞道扁舟足迴轉何時古寺  
傍檀溪幾處殘碑在江峴呼鷹臺高秋草多養魚池中  
蓮芡波蜀嵩未必不如此我今不遊奈老何張侯張侯  
蚤結屋莫待史詹為君卜要看隴上課兒耕好在魚梁  
白沙曲

子昂畫馬

憶昔從公侍書殿天閑過目如飛電池邊儘有吮豪人  
神駿誰能誇獨擅公今騎鯨隘九州人間空復看驂騑  
惟應馭氣可相逐黃竹雪深千萬秋

湛湛行

湛湛天宇玄以黝星白如銀垂近人牛羊散漫草多露  
大帳中野傍無隣去年八月羽書急婦女上馬小兒泣  
今年八月天子來身屬橐鞬月中立

家兄孟修父輸賦南還



大兄五月來作客八年不見頭總白五人兄弟四人在  
每憶中郎淚沾臆我家蜀西忠孝門無田無宅惟書存  
兄雖莞庫實父蔭弟竊微祿承君恩文章不如仲氏好  
叔氏最少今亦老土郎十歲未知學嗟我何為長遠道  
諸兒讀書俱不多又不力耕知奈何憂來每得二三友  
看花把酒臨風哦蜀山嵯峨歸未得盤盤先隴臨川側  
碧梧翠竹手所移應與青松各千尺南風吹雪河始冰  
兄歸烏帽何眾眾明年乞身向天子共讀父書歌太平

子昂墨竹

吳興畫竹不欲工腕指所至生秋風古來篆籀法已絕  
止有木葉雕蝨蟲黃金錯刀交屈鐵大陰作雨山石裂  
蛟龍起陸真宰愁雲暗蒼梧泣湘血吳興之竹乃非竹  
吳興昔年面如玉波濤浩蕩江海空落月年年照秋屋  
商德符畫幽篁古木

湘君宮在洞庭湖幽篁古木龍所都石壇雨長碧苔蘚  
水屋風動青珊瑚老人歌枕看螻蟻嫠婦停舟聽鷓鴣

江南蜀道問來往商公商公今有無

吳郡陸友仁得白玉方印其文曰衛青臨川王順  
伯定以為漢物求賦此詩

將軍騎從公主時豈意刻玉為文章珠襦已隨黃土化  
此物還同金鴈翔軍中只識長平侯西風木葉茂陵秋  
人生卑微何可忽碌碌姓名誰見收

為達兼善御史題墨竹

蜀道荒涼多古木竇當千尺相因依小年慣見今白髮

杜宇夜啼愁不歸老可嘗作陵州守古墨蛟龍多入手  
春雷每恐破壁去神鼎空令夔魃走丹丘越人不到蜀  
脩葉何以能縱橫內府人家爛熳寫使可見之心亦驚  
江南御史龍頭客暫別那能不相憶知君深識篆籀文  
故作寒泉溜崖石

畫鶴

薛公少保昔畫鶴毛羽蕭條向寥廓通泉縣壁久微茫  
故物都非況城郭長鳴濶步兒閒暇解寫高情亦奇作

田中芝草日應長石上松花晚猶落赤壁江深孤月小  
白雲野迥秋霄薄羣帝相從絳節朝八公許製黃金藥  
誤嬰塵網跡易迷移召中洲夢如昨借懸素壁憶真侶  
忽有微風動林壑碧虛寥寥積雪高直過蕭臺絕栖泊

題畫

棠梨生竹間牽牛引蔓相因依晨華墜露天水碧斷蘚  
絡石爛斑衣鷓鴣踏枝歲將莫蟋蟀在戶人當歸蕭條  
落墨人間稀蕭條落墨人間稀

寫廬山圖上

憶昔繫舡桑落洲，洲前五老當船頭。  
風吹雲氣迷谷起，霜墮楓葉令人愁。  
高入祇在第九疊，太白一去三千秋。  
石橋二客如有待，裹茶試泉春巖幽。

題旦景初僉司畫

旦公山堂城南畫，圖古檜何毵毵。  
城中無山有山癖，直藉毫墨窮幽探。  
旦公彈琴古檜下，鬱鬱窓戶生晴嵐。  
春雨時來鶴鳴谷，秋聲夜作龍吟潭。  
先皇晝坐羣玉府，

內使趣召飛雙驂畢宏韋偃出中秘營丘北苑開滕緘  
是時旦公主舒卷一二文士相交叅旦公歸來坐成想  
亦頗拈筆為梗楠伯熙奉詔每有作礪礪相並將無慚  
嗟予懷歸亦已久摩挲老目百不堪山中豈乏真偃蹇  
可容白髮抽朝簪

題柯敬仲畫

予先世居隆州州治之後山石室翁守郡時隆為陵  
州州事簡時來就吾家拾故紙背作茅蘭竹木之屬

所得頗多吾幼時尚收得數紙今亦亡之丹丘生用  
文法作竹木而坡石過之近又以新意作墨花甚妙  
從子悅有眉山學官之行丘為作此予愛而賦之

昔者老可守陵州守居北山吾故丘太守時來看山雨  
每畫紙背成滄洲老蒲松煙色過重揮霍陰崖交劒矛  
百年離亂亡故物散篋江南誰復收新圖簣管枝葉脩  
使我不樂思昔侯碧雞祠前杜鵑叫玉女井上叢篁幽  
棠梨樹高青子落碧花翠蔓紫牽牛揚雄無家不歸老



蠨蛸蟋蟀寒相求丹丘先生東海客何以見我空山秋  
蕭條破墨作清潤殘質刊落精英留陂陀重複分細草  
山石縈紆生亂流眉山學官莫厭冷言歸故鄉非遠遊  
石田茅屋倘可得萬里欲上東吳舟百花潭深濯新錦  
持報以比珊瑚鉤

白翎雀歌

烏桓城下白翎雀雌雄相呼以為樂平沙無樹托營巢  
八月雪深黃草薄君不見舊時飛燕在昭陽沉沉宮殿

鎖鴛鴦芙蓉露冷秋宵永芍藥風暄春晝長

敬仲畫扇

松根伏苓如石髓服食令人壽千歲子欲求之觀此圖  
老身偃蹇枝扶疎長鑱篝火新雨霽羽人丹丘期不至  
却剪蒼筤崖石間吹作龍吟秋滿山

題簡生畫澗松

簡生與我皆蜀人留滯東南凡幾春每拂齊紈作山水  
使我感慨懷峨岷如此長身兩松樹滿谷悲風散陰霧

雌雄如劍變為龍鱗鬣齊成擘崖去秘閣嘗觀韋偃圖  
蒼潤雄深世所無默識形神出模畫把筆莽蒼增嗟吁  
玉堂寶書本同館官府既分難復見摩挲新墨慰哀朽  
鬢雪飄蕭數開卷昔我樵牧青城山坐起政在雙樹間  
當時簡生若相見應并寫此聽潺湲劉郎集賢好賓客  
好著幽窻對晴碧凌靈為我哦七言有鶴飛來破秋色  
題李受益承旨作東平章萬戶繼志堂後

將軍腰間黃金符父兄功成百戰餘太平不復事弓馬

秋雨高堂聞讀書門有喬松墓有草永言思之願終保  
幙中賓客誰屬文東魯儒生國元老

題柯博士畫

磯頭風急潮水長蒹葭蒼蒼繫魚榜青山一髮是江南  
白頭不歸神獨往幽篁繞屋茅覆簷木葉脫落秋滿簾  
買魚沽酒待明月定是黃州蘇子瞻子瞻文章世希有  
謫向江波動星斗夜投斷岸發清嘯栖鶻驚飛怒蛟吼  
圖中風景偶相似欣然揮洒春雲開子瞻應是念鄉里

還化江東孤鶴來

題高彥敬尚書趙子昂承旨共畫一軸為戶部楊  
侍郎作

不見湖州三百年高公尚書生古燕西湖醉歸寫古木  
吳興為補幽篁妍國朝名筆誰第一尚書醉後妙無敵  
老蛟欲起風雨來星墮天河化為石趙公自是真天人  
獨與尚書情最親高懷古誼兩相得慘淡酬酢皆天真  
侍郎得此自京國使我觀之三歎息今人何必非古人

淪落文章付陳迹

題灤陽胡氏雪溪卷

去年予與侍御史馬公同被召出居庸未盡東折入  
馬家甕望縉山度龍門百折之水登色澤嶺過黑谷  
至於沙嶺乃還道中奇峯秀石雜以嘉木香草輦道  
行其中予二人按轡徐行相謂頗似越中但非扁舟  
耳適雨過流潦如奔泉則亦不甚相遠郭熙畫記言  
畫山水數百里間必有精神聚處乃足記散地不足

書此曲折有可觀恨不令郭生見之灤陽胡太祝乃  
以雪溪自號豈所見與予二人同乎然灤水未秋水  
已堅尋常已不可舟况雪時耶當具溪意云耳因為  
賦詩云

積雪平沙陰山道射虎殘年不知老豈識船如天上坐  
翠竹為帷樹為葆昔乞鏡湖苦不早白髮如絲照清潦  
他年此地若相逢應著漁蓑脫貂帽

題楊友直檢校所藏李營丘枯木圖

老龍出海蒼髯鬚營丘枯木天下無回枝屈鐵墮崖雪  
澗底應拾青珊瑚明堂清廟要梁棟朔風吹沙澤腹凍  
老身不用嘆遲莫按圖來求萬鈞重

題詹圃老梅圖

鄉人共識古梅樹移植詹亭仍百年計時當生宣政前  
僻遠幸遺花石舫昔僑寶唐尋故物石樓嵯峨白沙白  
陵陽慈竹樂公移根節相扶俱遠客此樹乃在隣邑間  
看花食實真足間人言支離故多壽我意培植茲惟艱



華蓋高人世師表為爾賦詩歌窈窕詹家孫子多讀書  
早晚春雷化龍矯

酬蕭侯送蒲萄

蕭侯昔致蒲萄苗山童不灌三日焦宛西上品復親致  
手種窻南水自澆一月當生一尺長移向江頭薜荔牆  
秋深雨足馬乳重舉囊石壓青霞漿是時蕭侯當走馬  
來訪衰翁茅屋下酒酣舞劍傾一尊不信金盤露如瀉

題袞塵騶圖

驂騑食粟石每既立仗歸來汗如洗脫羈展轉聊自恣  
落花塵土隨身起君不見春雷起蟄龍欠伸霧擁雲蒸  
九河水

律詩五言

林臯亭

九月天氣肅鶴鳴在林陰使君甚好客來者總能吟紅  
樹秋山近黃華夕露深隣翁八九十有酒即相尋

題子昂長江疊嶂圖

昔者長江險能生白髮哀百年經濟盡一日畫圖開僧  
寺依稀在漁舟浩蕩回蕭條數根樹時有海潮來

挽胡伯恭令尹二首

二十南陵薄才名舅氏同千金劍客散一棹酒舫空朱  
紱稱循吏安輿已病翁神明盡今日嘆惋謾羣公  
病起思歸日齋居卧治時抱孫方在膝反席遽如遺江  
路牽愁遠坊門望到遲遙怜賢弟哭未忍老親知

題雪谷曉行圖

踏雪度嶙峋霜髯跨玉麟  
前瞻那有際後至豈無人  
松樹紛紛老梅花的的春  
金烏海底出遍界爛如銀

送先隴二隣僧還吳二首

蘭若背山陰松筠夾逕深  
門閒容虎卧湖近聽龍吟  
雨過泉添澗風飄磬出林  
衲衣皆舊識一一謝幽岑  
東崦憶招提幽尋日未西  
過山隨虎跡倚石待猿啼  
雲外催歸錫松間覓舊題  
卜隣吾欲老母惜伴扶藜

節婦王夫人劉氏

憶昔中丞在清淳古道存節高賢女弟文托外諸孫慈  
竹宜家慶桓楹表國恩燕秦鬱相望美俗繫人門

次韻阿榮存初參議秋夜見寄

寓館城門夕高秋雨露開天垂華蓋近月轉紫垣來疏  
濶思良會淹留到不才深期謝安石揮塵散風埃

雪谷早行

積雪擁柴門行人稍出村溪頭或遇虎木末不聞猿接  
棧迴山閣支橋就樹根駢車上重坂回首見朝曦

雪巖樓觀

高閣丹青起中天紫翠分窓當太白雪門俯九疑雲伐  
木山人去吹簫帝子聞塵中歸未得春思轉紛紛

送人之劔閣倅

往年登劔閣快馬著春衫設險懷前賦磨崖覓舊剏鄉  
人遊雪界郡倅試冰街歸道觀新政春江不掛帆

寄子山尚書

竹色侵衣碧重簾雨氣深白鵝翻墨沼紫燕入書林北

海春尊側西山夕閣陰東曹公事少歌舞散黃金

漫興

雨閣添衣潤風簾隱几高白頭更事少病目向書勞南  
客傳音信東家問酒醪江邊茅屋破歸楫若為操

送張尚德

史館薦張尚德為檢閱官朝廷以為宜稱可其請未  
奏也有司以闕簿注新進士尚德頗有聞即歛裳宵  
逝噫進退若是可以信史館之薦人矣予力雖不足

以留之亦終不敢失之也故作是詩以餞之

六月初聞雨官河潦水生江南歸宋玉稷下謝荀卿鵬  
鶚青霄迥蕙葭白露盈都留詩興在來聽上林鶯

寄丁卯進士薩都拉天錫鎮江錄事宣差

江上新詩好亦知公事閒投壺深竹裏繫馬古松間夜  
月多臨海秋風或在山玉堂蕭爽地思爾佩珊珊

送趙繼清令尹之官安陸

雲夢開七澤陪尾貫連山為政烟塵表吟詩松竹間故



人總華要令尹獨清閒文學偏宜老母愁鬢髮斑

明皇按樂圖

新度霓裳曲三年教得成驚鴻渾不下飛燕若為輕芍  
藥春亭莫芙蓉野水生梨園多白髮吹笛到天明

送長沙守

白髮長沙守循良又好文近辭金馬去遠有玉魚分對  
竹聽湘雨開簾看嶽雲漢廷思賈誼一飯莫忘君

送趙編脩祀西嶽江瀆

西道祠官去東風入旆斜汾陰已歸鴈江水正飛花歲  
事聞宜穀鄉人喜過家老來思故里欲寄使君車

代衆仲作

昔在泉州住將軍每見招春雲山對屋夜雨水平橋池  
鴨穿荷葉溪魚上柳條禁城鐘鼓起車馬晚蕭蕭

題宋雲舉太常臨汾二節婦序後

許氏姪從姑相承患難餘自傷還自誓同志復同居白  
髮冰霜共丹心鐵石如有關名教重珍重太常書

送王照磨之官雲南

遺廟珍珠浦歸舟  
焚道溪飛鳶愁暑  
雨走馬畏山泥官  
署尊丹鷺祠官勝  
碧鷄題詩遠相送  
紅日五雲西

玉堂燕集圖

朝廷多暇日別館  
又青春薄醉猶催  
酒清歌況有人玉  
堂金硯匣翠袖白  
綸巾老去渾無賴  
憑誰為寫真

寄答桂風子先生

深隱廬山裏題詩  
忽見存風高應跨  
虎月落更聽猿酒

熟邀皆去丹成笑不言雲屏第九疊相與浴晨暎

寄莆田先生

懸榻塵生席深居晝下帷齊眉安饋食擁髻近歌詩藥  
裹須鍾乳書題憶荔枝白頭吟更苦何必蜀人思

鄭谷圖

道士徐太虛生紙畫山居林壑春烟裏桑麻夜雨餘過  
橋九節杖連屋一床書似是子真谷歸耕三月初

畫檜

茅山多古樹此檜更長生  
鸛鶴棲來穩蛟龍化得成  
雲深還近戶月落似聞笙  
千載如相見蒼然故舊情

李員嶠墨竹

河東李學士隨意做洋州  
月落亭陰迥雲生谷口幽  
江濤空渺渺筆墨更悠悠  
瀟灑西清地令人憶舊遊

為歐陽少監題宋好古竹

幕中能寫竹作此雨瀟湘  
出石根還瘦臨溪影更長  
班班稚子立一一鳳雛將  
日有長安使平安問老蒼

贈楊友直

雒陽楊友直字儼漢中郎畫若錐穿石垂如雨漏牆舞  
花羞女美醉草笑僧狂昨日鴻都學煩君寫數行

題朱郎竹木

江上復春雨曾陰覆碧波石高龍影卧林迥鶴聲過解  
佩猗蘭浦揚旂落木坡佳人翠袖薄日暮欲如何

寄阿勒呼木學士

問訊東泉老江南又五年涼風鳴步屨明月棹歌船陪

講長懷舊還朝獨後賢治平二三策蚤晚玉階前

赤壁圖

過鶴生新夢携魚憶舊遊清霜凋木葉落月湧江流隱  
者時堪訪良田亦易求如何玉堂夜白髮不勝愁

題况肩吾縣令贈行卷

縣庭都禁謁祗許見諸生接壤皆興學遊民亦願耕絃  
歌居室迴山水畫圖清千載雲巖石能留令尹名

送朱萬初之廣東照磨

聖主多清暇臨池愛日長天章垂鳳彩雲氣動龍香進  
諫慚簪筆爭書敢近牀承恩君最蚤服玉向炎方

八月八日有感題視草堂壁

載筆趨芸閣探囊索縵袍坐銷秋日淨心折夜風高識  
字頭先白謀生計轉勞文園多病渴常想賜蒲萄

賦程氏竹雨山房二首

春雨過山竹幽泉繞舍鳴燕泥書帙晚魚浪釣絲晴奉  
席從孫子連床總弟兄舊聞林下叟讀易到天明



遊子聞春雨思親望故園竹間開几席花底注山尊累  
世書連屋頻年稻滿村卜鄰淳朴地絕學欲重論

戲作試問堂前石五首

試問堂前石來今幾十年衰顏空雨雪幽致自風烟微  
醉寒堪倚孤吟靜更眠舊湖春水長誰繫釣魚船

為問堂前石何年別太湖春風神不王夜月影長孤不  
中明堂柱空遺艮嶽圖頗思嘉種木歲晚與相扶

為問堂前石何無藤蔓纏金蓮疑可致紫菊若為妍舊

夢遺波浪間情閱歲年祇緣相識久親為濯清泉

碣石久淪海女媧曾補天乾坤遺最爾霧雨護蒼然  
淬劍龍隨化彎弓虎自全昔賢多賦此誰賦最流傳

為問堂前石屢逢堂上人遠來嗟最久獨立與誰隣  
運載勞車馬摩挲識鳳麟鑒車書吉日追琢到嶙峋

代石答五首

幸自隣頑鄙毋煩問歲年當寒金作礪向暖玉生烟  
眉黛無歸意毛羣有叱眠涼州三百斛亦未酹觥船

昔觀一柱觀還度幾重湖雪盡身還瘦雲生勢不孤  
穿鄴臺瓦賦就草堂圖芝閣玄雲在危踪敢藉扶  
牛角何堪礪蝸涎謾自纏沉冥辟邪古羞澁望夫妍  
神物須清鑒靈根屬小年金輿曾共侍千載憶甘泉  
轉徙寧論地存留亦信天露盤危欲折劫火不同然  
維下殘經斷岐陽數鼓全向無文字托寂寞竟誰傳  
去歲留詩別嗟哉白髮人冠依子夏製居切左丘隣  
執簞充振鷺脩辭綴獲麟終須愁坎壈勿用誚嶙峋

送魯子翬庶使之漢中

封上頌臺禮輕車入漢中  
節毛吹渭雨木葉動秦風  
把酒臺基古馳書歲事豐  
朝回倚西閣日日數歸鴻

立春夜試墨

輕雪作春花飛來入髻斜  
紫貂迎曉霧絳蠟炫晴霞  
書詔頻趨閣思歸即借車  
幾時將稚子隨意踏江沙

蜀人曲江之官贈以墨竹

粘筆寫琅玕清風入室寒  
蜀山空偃蹇海郡更盤桓  
雲

霧瓊簫遠冰霜玉節完莫忘鄉里意持向曲江看

正月十一日朝回即事

宮樹春陰合霓旌拂曙來天光臨閣道雲氣轉蓬萊  
晝漏沉沉鼓晨尊艷艷盃香霏簾底霧樂殷殿前雷  
祥瑞儀曹奏珍淳尚食催舞庭分鷺序效獻過龍媒  
融雪微生草輕風不動埃老人南極至王母上方回  
玉色何多喜金華得重陪裁詩賀新雨西閣待門開

贈別兵部崔郎中暫還高麗即回中朝

東髮來東海從軍護北門珠光連旭景玉氣達春溫淵  
靜龍含德門嚴虎列屯從容叅幄帳慨慷屬橐韃拜表  
推黎獻趨朝謁至尊雲依溫室樹星入紫微垣不道璫  
璵貴仍嬰筦庫煩利行雖近市義守不窺園春遇忘身  
得危難欲手援懷邦維父母於國實甥婚闕還羈勒

原闕致壁殮魯連名竟重箕子教應存簡在從當日扶

持備宿藩清宮風肅肅驟乘火煇煇帝所為郎重王家  
報禮惇暫伸桑梓敬未愛李桃繁神闕秋期蚤康侯晝

錫蕃九成思閣鳳六月待冥鷗

次句筠軒司徒足成旦公所藏英宗御題之句元  
題曰日光照吾民月色清我心又題琴曰至治之

音

化國多長日高人侍紫宸觀書從上相屬筆念生民雲  
漢文章備風雷號令新惟應青簡在能載古風淳御翰  
龍池曉緒經驚殿陰雲依清靜葉月印妙明心千載堂  
堂去諸天肅肅臨朱絃誰為鼓至治有遺音

次句李侍讀東平王哀詩

宇宙生奇變，明良陷逆圖。傳聞昏白晝，悲憤結全區。治  
極機潛否，恩深事失謨。犯車仍斷軌，壞戶竟傷樞。魑魅  
嫌明鏡，強梁忌雅模。甘心成首禍，藉口肆羣腴。隱忍危  
衝決，憑陵善唯俞。自天俟鈇鉞，累月具簞壺。裹革疑亡  
地，招魂競出都。笳鳴殘夕月，馬嘯四交衢。所痛倉皇際，  
將無古昔殊。腹心何蠱蝕，肘腋不支梧。列位多翹楚，干  
城總豹貙。詎言歸厄數，不復頌貞符。天討公無赦，皇心



愛不姑報讎論婉孌錫爵酹嗚呼相業今如在民生實  
少痛誰能疵璧玉唯有泣瓊珠執簡書羣盜當關欠一  
夫馳奔嗟薄日沐浴止中途決去思投闕違之或汎湖  
危知無復死恨不奮前誅春雨煩冤滌朝陽癩思蘇謳  
吟申感慨述作惧荒蕪芒忽思離散煮蒿起苑枯神還  
嵩岳峻氣直斗杓孤陟降先皇側回翔造化徒英靈常  
會合瞻想豈虛無

慶史顯甫治書父八十

治世尊三壽高年見八朝羽儀叅漢皓神觀邁周喬柱  
下聲名遠壺中日月饒微醺霞灼灼新沐雪蕭蕭地厚  
原初峻天全玉不珣一經傳令子貳憲肅羣僚侃侃稱  
時望英英樹國標繡衣兼綵服白日上青霄上壽歸榮  
異推恩錫爵超紫深宗伯橐金重列侯腰珍膳應恒從  
安車必見招乞言逾藥石報德稱瓊瑤千歲庭來鳳羣  
工韻合韶陳詩方懿頌擊壤比康謡

送國王多爾濟之遼東

太祖收中夏元臣有武功建邦開土宇為位冠君公奕  
世王章在諸孫相業隆春秋周正月禮樂魯新宮鹿幣  
金遺耐熊侯筭失中河山仍鐵契寶玉右琯弓投筆鄒  
枚秀揚旂綬綰雄塞雲依碣石凍雨洒遼東戎器橐藏  
盡賢書奏納同大夫勞誓御惇史采民風

送陳碩

莆田陳氏慶歷名法從故家也自衆仲來京師集得  
友焉凡問學脩己之事有益於愚陋多矣又從知其

父兄之賢也問所自出則南塘趙氏信乎其學之有傳矣嘗以其從子碩來見予愛其端謹可望南歸省父衆仲送之以文予不能忘也乃賦詩曰

六歲過閩郡書聲憶滿城目盲今子夏心醉昔延平爾叔同游息吾文愧老成每分重席暖相對一燈明遠海乘桴意高山伐木情願携筇竹杖往看離支生辟掾青衫舊趨庭綵服輕為言穿木榻亦未厭藜羹寶瑟留飛鴈蘭舟及轉驚佩懷湘渚贈綬向會稽迎去去江雲濕

飄飄島霧清重來知有意時我已歸耕

奎章閣有靈壁石奇絕名世御書其上曰奎章玄  
玉有勅命臣集賦詩臣再拜稽首而獻詩曰

禹貢收浮磬堯階望喬雲自天承雨露拔地起綢緼擊  
拊聲音合衡從玉兆分巨鼃三島力威鳳九苞文辨位  
資乾坎為山鎮幅員固知興寶藏不假運神斤書帙侵  
春潤香爐借宿薰烟光晴冉冉波影晝泫泫融結繇元  
化登崇荷聖君瑞於龜出洛重若鼎來汾柱立尊皇極

磐安廣帝勛詎云陳秘玩因願獻前聞

送南宮舍人趙子期宣詔交趾


三年頒正朔五月向南交將命方離闕陪臣已在郊衣  
裳鴻羽漸干威虎皮包瘴霧衝風散瀧湍急雨捎朱鷺  
窺土室白雉下櫓巢夜浦鮫停織陽岡荔折苞初筵分  
氍毹後騎器笳鏡諏日脩王貢兼時眡客庖方言書仄  
理海錯藉青茅漢柱苔侵篆秦林桂拂旃括囊無意改  
當戶有蠨蛸即見還英節毋煩筮絲爰

道園學古錄卷二

謹案卷二第十四頁後四行薩都拉舊作薩都刺  
今改後倣此 十七頁後七行阿勒呼木舊作  
阿魯輦今改後倣此 三十三頁後八行多爾  
濟舊作朶而只今改後倣此







總校官庶吉士臣張能照

校對官編修臣馬啓泰

謄錄監生臣范來泰